



Gabinete Wever - Croes II

ISLAONLINE


Noticia di Gobierno

2023

Diabierna 23 Juni 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



'PERIODISTA PA UN DIA' TA ENCURASHA NOS MUCHANAN E HABILIDAD PA HACI CUA PREGUNTA CU NAN TA DESEA DI HACI



'Periodistanan pa un Dia' di diabierna 23 di juni tawata Ailani Perez, Skylee Tromp, Kaylee Croes, Luna Basuari Quiroz, Lishaina Kock y Ciara Winterdaal. Contento e hobennan a drenta e sala di conferencia di Gobierno di Aruba acompaña pa mayornan.

E presentadora den Conferencia di Prensa di Gobierno di Aruba, señora Sandra Croes, a splica e muchanan, cu tawata hopi ansioso pa scucha, e proceso di cada conferencia di prensa di Gobierno. Sandra a splica e muchanan cu na principio e tawata bira un tiki nervioso pasobra tawata un trabou nobo y diferente na loke semper e tawata haci. Sandra ta gradua pa dokterassistent na Hulanda cual profecion el a traha y eherece masha poco. Desde cu el a regresa Aruba, el a pasiona pa e mundo di medionan di comunicacion y presentacion y tin un trayectoria largo pa mas di 15 aña. Sandra a conseha e muchanan cu tur loke nan cuminsa haci den bida, semper hacie cu amor y orguyo pasobra asina so lo vence e miedo di haci algo nobo.

Pa e siman aki, e periodista invita ta Aldric Werleman di TeleAruba. Aldrick tin 27 aña trahando den e mundo di Television na Aruba. El a studia "Liberal Arts" na Merca. Despues di su estudio, Aldrick a traha den canalnan di television como editor di noticia, productor di noticia na Papiamentu, Ingles y Spaño, graphic designer, programanan special, raportahe special, noticia internacional durante Covid, y a percura tambe pa e New Look di Telenoticia. Na 2016, Aldrick a a cuminsa realiza un noticiario completo na Spaño, "Primera Plana con Alejandra Forero". Na aña 2021, Telearuba a nombra Aldrick como director di Telenoticia y hunto cu Andrew Vrolijk, ta dirigi e departamento cu ta consisti di un team di 9 persona. Patrick a expresa na e muchanan cu periodismo ta hopi importante pa nos comunidad. E ta un herment pa uza pa informa un comunidad corecto, obhetivo, transparente cu ta permiti pa uza investigacion y creatividad pa realiza storianan, noticia cu ta keda veridico y ta mantene nos tur bon informa. Aldrick cu tur pasenshi a prepara e muchanan pa e Conferencia di Prensa cu Prome Minister y a guia nan con pa haci nan pregunta.

Continuacion 'PERIODISTA PA UN DIA' TA ENCURASHA NOS MUCHANAN....

Algo cu nos Perodistanan pa un Dia a keda hopi contento ta nan encuentro cu Prome Minsiter Evelyn Wever-Croes den sala di Consejo di Minister y tur a keda hopi impresiona y feliz di a conoce Prome Minister y di e splicacion di e trabou di Gobierno y e desicionnan importante cu ta wordo tuma den e sala di Consejo di Minister.

Despues di nan bishita den Sala di Consejo di Minister y Oficina di Prome Minister, e Periodistanan pa un Dia a regresa den e sala di conferencia na unda cu a tuma luga e Conferencia di Prensa Hubenil. Aki, un pa un, e muchanan a haya e oportunidad pa haci nan preguntanan na Prome Minister.

Cu placer Prome Minister a scucha y contesta cada pregunta di nos periodistanan hoben. Preguntanan cu a varia di bida personal, estudio, profesion y conocimiento general. Y na final, Prome Minister a indica cu e intencion di e Proyecto Periodista pa un Dia ta pa nos muchanan cera conoci cu e trabou di periodistanan na Aruba. Y tambe, pa encurasha nos mucha e habilidad pa haci cua pregunta cu nan kier, den e caso aki, na Prome Minister. Y nan tin derecho pa haya contesta. Pa e motibo aki tambe, e Conferencia di Prensa Hubenil aki tawata live via TeleAruba y Pagina di Facebook di Gabinete Wever-Croes.

Prome Minister ta gradici tur esnan cu a haci 'Periodista pa un Dia' posibel y un exito. Danki tambe na señor Aldric Werleman di TeleAruba pa su tempo pa splica nos muchanan mas di e trabou aki. Danki na TeleAruba cu a partner cu nos den e Proyecto aki. Danki na e mayornan pa permiti nan yiunan participa y danki special na nos muchanan cu a participa.





ARUBA A PERDE UN GRAN BALUARTE MUSICO, DEN PERSONA DI FELIX (CHUCHO) HOEK



E siman aki Aruba a wordo conmovi cu un noticia tristo cu un otro gran baluarte musico a bay laga nos, sr. Felix R. Hoek, miho conoci como 'Chucho', kende a nace riba 7 di januari 1962 y a fayece dia 20 di juni ultimo.

Chucho tin un formacion academico riba tereno di musica y a logra su Bachelor den musica profesional na Berklee College of Music na 1986. Chucho tabata docente di guitarra clasico/ electrico, baho y lesnan di teoria di harmonia, areglo y solfeo na Stichting Arubaanse Muziekschool/Scol di Musica Rufo Wever pa 9 aña. Despues el a asumi e rol di director te na su fayecimento. Como musico, Chucho a dirigi y acompaña diferente bandanan musical den hotel y comercial. Ademas, Chucho tin un lista extensivo di obranan composita y aregla pa varios cantante, banda, festival, competencia y actividadnan musical. Tambe, Chucho a compone y aregla jingle pa radio y television. Chucho a para hurado na diferente festival- y competencianan den exterior, a presenta cu bandanan den exterior y sin kita afo: e tabata integrante di diferente banda musical na Aruba. Chucho Hoek su contribucion na Aruba su cultura y formacion musical di generacionnan hoben atraves di su talento y conocimiento musical ta uno grandi.

Aña pasa na november riba Dia internacional di Musica na honor di Santa Cecilia, patrona di tur musico, Minister Maduro


a reconoce sr. Chucho Hoek como un baluarte musical di nos Pais Aruba. Debi na kebrante di salud Chucho no por tabata presente, pero digitalmente por a sigui su reconocimiento y e aprecio cu a wordo expresa pa tur su obranan maestral. Obranan cu a toca, inspira y a contribui na enrikece nos herencia cultural musical. E reconocimiento tabata bisa, "Danki pa e añanan dedica na enrikece cultura di nos Pais Aruba pa medio di bo talento y creatividad musical". Ademas Minister Maduro a gradici Chucho pa tabata un digno embahador di nos dushi idioma Papiamentu.



Minister Maduro den nomber di Gobierno di Aruba ta expresa palabra di condolencia y forsa na sra. Gina, su yiu y demas famia. Tambe palabranan di forsa pa su coleganan musico den e dianan dificil aki. Masha danki 'Chucho' pa bo gran contribucion na Aruba su cultura musical y pa tur loke bo a laga atras como bon ehempel pa nos hobennan.



THIS IS JUST ONE
HISTORIC recognition of
many successes
to come of your
PASSION,
& DEDICATION
ENTHUSIASM



Ministerio di Turismo y Salud Públicu



INSTITUTO MÉDICO
SAN NICOLÁS

ImSan

Where people meet care.



MODELO MACRO-ECONOMICO MARUBA TA UN INSTRUMENTO IMPORTANTE PA MANEHO

Riba 22 di juni, Minister Geoffrey Wever, a ricibi un presentacion di Departamento di Asuntanan Economico, Comercio y Industria (DEACI) riba e modelo MARUBA. MARUBA ta e modelo macroeconomico cu Gobierno di Aruba ta uza pa hasi entre otro proyeccionnan riba con economia di Aruba lo desaroya y tambe por wordo uza pa simula e impacto macro-económico di maneho.

E modelo MARUBA ta basa riba e Cuentanan Anual di pais Aruba. Cifranan ta ser colecta y publica pa CBS cual ta refleha e funcionamiento di e economia di Aruba. DEACI ta encarga cu maneho di e modelo MARUBA. E Comision Macro Model ta den dialogo continuo cu diferente instancianan y expertonan local, y a base di intercambio di informacion ta haci analisis di diferente desaroyo y asina produci e "Economic Outlook 2022 - 2023".

"Economic Outlook 2022- 2023" ta e proyeccion economico cu ta wordo uza den e presupuesto di pais Aruba. MARUBA ta un instrumento esencial den esaki. E uzo di MARUBA ta posibel danki na e bon cooperacion entre stakeholders y disponibilidad di data. Data riba diferente area economico manera turismo, consumo, y inversion ta di sumo importancia pa facilita e uzo di MARUBA.

"E presentacion riba uzo y funcionamiento di MARUBA, un instrumento di maneho esencial pa Pais Aruba, tabata importante y ta muestra e necesidad pa tin acceso continuo na data pa asina analisa y monitor nos desaroyo economico den cooperacion cu nos partnernan", segun minister Geoffrey Wever, kende ta gradici directora Maria Dijkhoff- Pita, drs. Judesca Briceño y drs. Jason Lejuez di DEACI pa e presentacion y e trabao diario pa mantene nos informa di desaroyonan macroeconomico, a traves di e modelo MARUBA.

E publicacion Economic Outlook 2022- 2023 ta disponibel riba e website www.deaci.aw





COLEGIO LAURA WERNET TA CELEBRA DIA DI SAN JUAN



Diabierna mainta, en conexion cu celebracion di San Juan, Minister di Enseñansa y Deporte Endy Croes a bishita scol basico Colegio Laura Wernet Paskel na Santa Cruz. Manera tur aña, Colegio Laura Wernet Paskel ta celebra Dia di San Juan y asina ta cultiva y sigui engrandece cultura di Aruba.

E fiesta cultural di San Juan (Juan Bautista), miho conoci como Dera Gay ta data for di 1862 y nos ta celebr'e tur aña dia 24 di juni. Tin diferente version tocante e origen di e fiesta religioso y cultural aki cu Aruba ta celebra como un fiesta nacional. E origen religioso ta referi na e nacimiento di Juan Bautista y e origen cultural ta referi na e fiesta di cosecha. Como fiesta cultural, dia di San Juan ta mas conoci pa su musica, baile, cendemento di candela, cuminda tipico y bebida.

Dia 24 di juni, despues di bahada di solo, e fiesta di San Juan ta cuminsa den diferente districto cu baile di Dera Gay, baile di bula candela y baile di bandera. E baile di candela ta pa



proteccion contra malesa y mala suerte. Tambe tin e baile di bandera, diferente banderín ta wordo poni riba vloer y e bailado cu su wowo bon mara mester piki e banderinnan. E baile mas conoci t'esun di Dera Gay, unda e hende homber cu su wowo mara y c'un palo den su man mester purba mata e gay. Minister Endy Croes ta desea Pueblo di Aruba feliz Dia di San Juan.



Positivismo ta un factor importante pa logra union. Ora cu famianan y comunidadnan ta traha hunto pa metanan comun, e chens pa exito ta bira mas grandi. Tambe e ta crea un ambiente mas stabiel y harmonioso cu ta necesario pa e crecemento y desaroyo di un sociedad.